



UNIVERSITÄTS-
BIBLIOTHEK
PADERBORN

Universitätsbibliothek Paderborn

Joannis Commirii E Societate Jesu Carminum Libri Tres

Commire, Jean

Lutetiae Parisiorum, 1678

Ad Santolium Victorinum. Aeterna esse praemia poetarum qui Latine scribunt. Ode XVII.

urn:nbn:de:hbz:466:1-14818

Quod si haud recusas me juvenem senex
 Dixisse amicum ; pectore si sacro
 Admittis : immortale nectar
 Ducere cum superis videbor.

AD SANTOLIUM VICTORINUM.

Æterna esse præmia poetarum qui Latine scribunt.

O D E XVII.

NON, si carmina Gallicis
 Apte juncta modis , ingenî & artium
 Idem cultor & arbiter
 Colbertus meritis muneribus fovet ,
 Romanæ , ut quereris , lyræ
 Omnis continuo laus perit & decus ,
 Santoli. Neque præmia
 Illum deficient , Virgilio duce ,
 Versus per similes tuis
 Quandoque Ausonia qui recinet tuba.
 Nescis ut patrio novam
 Sermoni faciem quæque ferat dies ?
 Nam quas nunc misere anxius
 Scriptor quærere amat delicias , brevi ,
 Usus si volet insolens ,
 Spretas rejiciet non sine nausea.
 Ronfardus male barbaro
 Molles auriculas murmure vulnerat ,
 Dictus Franciacæ pater
 Linguæ. Quis modo non unius æstimet
 Assis vendita millibus
 Terdenis opici carmina Portei.

Et jam Perronide jaces :
 Jam , Malherba , tuos Sequana parcus
 Miratur numeros. Fugit
 Laudatus populis Vetturium lepos :
 Festino & nimium pede
 Chartas Balzacii deseruit Venus.
 Sic mori placitum improbo
 Fastidire , semel quod placuit , diu.
 At certus Latiis honos ,
 Et vani haud metuens tædia sæculi
 Perstat gratia vatibus.
 Vivet perpetui Musa Sidronii
 Puro flumine purior :
 Et qui nunc cithara provocat æsculis
 Auditas Calabris fides ;
 Acri nunc lituo Mæoniden refert ,
 Felix ponere Vvallius
 Incano duplicem vertice lauream.
 Rident sole sub aureo
 Flores nigram hyemem , quos facili manu
 Inlevit meus & mero
 Rapinus nitidos nectare perpluit.
 Et te fama , Ruæ , anus
 Tradet postgenitis , non humili pede
 Perfultantem Isalæ vada :
 Dum cantu Batavos exagitas duces ;
 Et quos rex gladio ferit ,
 Æterno calami figis acumine.
 Nec te , Frizo , finet premi
 Obscuro indecorem posteritas situ :
 Cui si me ingenio parem
 Turenni annuerint dicere prælia , &

Rubros sanguine Belgico
Musæ Borbonidas ; non aliis velim ,
Obscœni fugiens lucri ,
Ornari potius carmina præmiis.

AD LÆLIUM.

Ut speretis mortalibus ad æterna aspiret.

ODE XVIII.

CUR vanis male credulum
Irretire animum pergis amoribus,
Fortunæ toties fidem
Expertus nimium fallere lubricam ?
Tandem desine vitreâ
Insanire Deâ : quam cupide simul
Amplexaberis insolens ,
Mœrebis laceras flebiliter manus.
Felix vulnere si tamen
Tantillo monitus , præcipiti caput
Fracturam tibi pondere
Mature fugias. Hesperio licet
Sublimis folio feras
In centum populos jura , nec unicus
Orbis te dominum colat ;
Læli degeneres : ni spatiosius
Regnare ambitio , & suæ
Par quæsisse decus certet origini.
Villæ culmina sordidæ
Mirari pudeat , quem socium Deus
Æterni vocat imperi ,
Et sperare jubet fidereas domos :